

*ASO LULU, 12 AOKUSO 2015*

### **FAASILASILAGA A LE FAILAUTUSI**

**FAILAUTUSI:** E tusa ai ma Tulafono Tumau 26, ou te faasilasila atu ai, ona o le toesea ai o le Afioaga i le Fofoga Fatalai, ou te tapa ai ma le faaaloalo lau Afioaga i le Sui Fofoga Fatalai ina ia nofoia le Nofoa o le Fofoga Fatalai.

*Na nofoia le Nofoa e le Sui Fofoga Fatalai i le itula e 9:00 i le taeao.*

Tatalo.

### **SAUNOAGA FAAFEILOAI A LE SUI FOFOGA FETALAI**

**SUI FOFOGA FETALAI:** E faasilasila atu ua amataina nei Taualumaga a le Fono Aoao Faitulafono.

O lea ua maea sii le viiga ma le faafetai i le Atua e pei ona avea ai au ma o tatou sui i Ona luma, e sulaina Lona alofa ma Lona agalelei, ina ua tatou maua lenei taeao fou e faaauau ai galuega.

E faatalofa aloaia atu i lau Afioaga i le Palemia faapea lau Kapaneta, faapea foi sui usufono mamalu o le Palemene ua aofia i lenei taeao, aua le faaauauina o tatou galuega tuua mai le aso ananafi.

E faatalofa atu foi i le faafogafoga tapuai mai a Lana Afioaga Mamalu, O Le Ao o le Malo o Samoa ma le Masiofo, faapea foi le Sui o le Fono a Sui Tofia ma le Masiofo, ae a le loaloa o Samoa se i oo lava i se o aupito ititi.

E faatalofa atu foi i le Afioaga i le Failautusi faapea le Sui Failautusi ma le Matagaluega o le Ofisa o le Fono, e faapea foi Ofisa Sili o Pulega ma Pule Sili o Matagaluega ma Faalapotopotoga ua tatou faatasi i lenei taeao, talofa, talofa lava.

### **TUUINA ATU O LIPOTI A KOMITI FILIFILIA**

*Na tolaulauina e le Failautusi le Lipoti a le Komiti Filifilia ua faataatia i luga o le Laulau a Fono e tusa ai ma le T.T.51.*

1. P.P. 2015/2016 Nu. 40, Lipoti a le Komiti o Galuega, Felauaiga ma Siosiomaga i le Tulafono Tau Faaofi o Teuteuga o le Tulafono o Taavale Feoai i Ala Tetele 2015.

**12 AOKUSO 2015**

**TULAFONO TAU FAAOFI O TEUTEUGA O LE TULAFONO O  
FAIGA PALOTA (NU. 3) 2015 – felafolafoaiga faaaauau i luga  
o le faitauga faalua – Aso 2**

**FOFOGA FETALAI:** E tolopo Galuega a le Fono Aoao i le aso Fono ananafi o lo o saunoa le sui usufono mo Sagaga le Falefa.

Tulai mai lau Afioga i le sui usufono e faaaauau lau saunoaga.

**Tofa TUISA TASI PATEA (Sagaga le Falefa):** I le ava ma le faaaloalo lava i lau Afioga i le Fofoga Fetalai, masalo o lena eí Faafetai.

**Afioga MAUALAIVAO PAT AH HIM (Palota Taitoatasi):** Lau Afioga i le Fofoga Fetalai í

**SUI FOFOGA FETALAI:** Tulai mai lau Afioga i se tasi o sui usufono mo le Au Palota Taitoatasi.

**Afioga MAUALAIVAO PAT AH HIM:** Faafetai i lau Afioga i le Fofoga Fetalai.

E tulai atu ma le faaaloalo tele ma le ava, e faafetai foi i lenei taeao fou ua aoina le alofa o le Atua i le soifua laulelei o le tatou Palemene nei e afua mai i le Taitai faapea foi sui usufono mamalu o le Palemene.

Ma o lea ou te tulai atu ma le faaaloalo lava, o le aso ananafi lea ou te manino i ai, sa gata maíí

E faamalulu atu o le faaui lava a le Afioga i le Taitai o le Itu Agai ia po o se lauga, a o lou tulai atu ma le faaaloalo, e fia fai foi sina faamatalaga e tusa ai ma le Tulafono Tau Faaofi lea.

Ma le faaaloalo tele.

**SUI FOFOGA FETALAI:** Tulai mai e faaaauau le saunoaga, lau Afioga i se tasi o sui usufono mo Palota Taitoatasi, Afioga Maualaivao Pat Ah Him.

**Afioga MAUALAIVAO PAT AH HIM:** Faafetai lava i lau Afioga i le Fofoga Fetalai i lenei foi avanoa.

Ou te talitonu o lou tulai atu ma lou faaaloalo i lau malelega i le Nofoa, ona o au nei o le sui usufono o le Itumalo Nuu Tu Taulaga lea uaí ..ae faafetai o lea lava eí ..

**Afioga Toeolesulusulu Cedric Pose Salesa Schuster (Aana Alofi Nu. 3):** Lau Afioga i le Fofoga Fetalai, o le mea e fia faamalamalama faamolemole lau Afioga i le Fofoga Fetalai.

**SUI FOFOGA FETALAI:** O le a le mea lea e fia faamalamalama?

**Afioga Toeolesulusulu Cedric Pose Salesa Schuster:** Faamolemole ona o lea ua saunoa le sui usufono lea, o ia o le sui usufono i Itumalo Tu Taulaga ae le i fiai se palota e fai ai ma sui usufono, o lo o avea pea maí . E moni lau saunoaga o le sui usufono mo Palota Taitoatasi, faafetai.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

**Tofa Lealailepule Rimoni Aiafi (Faleata Sisifo):** Lau Afioga i le Fofoga Fatalai o le mea e fia faasao.

O le tulaga lava o lea ua i ai, ua leai ni Nofoa o nai sui usufono ia, ua leva ona tatau ona malolo ma le Palemene.

Ma le faaaloalo lava.

**SUI FOFOGA FETALAI:** E taumafai, o le fautuaga a le Nofoa e tausisi le mamalu o le tatou Fono. O se faamatalaga mai le Nofoa, o lea e agatonu lau saunoaga, o lea ua ou faaleo atu, o le sui usufono mo Palota Taitoatasi. Faaauau le saunoaga.

**Afioga MAUALAIVAO PAT AH HIM:** Faafetai tele lava i lau saunoaga i lau Afioga i le Fofoga Fatalai, ia o le a faapea ona fai. Ma o le a ou le toe ta i le pola e motu i tua e pei ona tulai mai ..ioe, ua tatou afisio mai ma tala mai aao ia tatou fai malu o tatou faiva, ia e amata lava foi i lo tatou fefulituai mai .. ae ui i lea, ia e leai e faapena lava ona maua ai le malie o tatou Fonotaga.

Lau Afioga i le Fofoga Fatalai ma le mamalu o le Palemene, sa tele saunoaga e tusa ai foi ma le tatou Tulafono Tau Faaofi lenei o Teuteuga o le Tulafono o Faiga Palota (Nu. 3) 2015 i ona suiga ma ona vaega eseese e tusa ai ma le faataatia mai o le Tulafono Tau Faaofi. I le matau atu, e leai se mea e fai atu loa atoatoa, ma ou te talitonu i le matou vaavaai, e matou te lagolagoina lenei suiga ua i ai, faafetai atu ai i le Afioga i le Minisita e ona lenei Tulafono Tau Faaofi, ona ua i ai ni vaega o le Tulafono Tau Faaofi e limataitaiina ai ma faapena ona faatonutonu ai ma taumafai ina ia tatou tausisi ia aua ne i maua i tatou i le soli o se Tulafono, ae o lea ua i ai ia vaega eseese o le Tulafono Tau Faaofi e limataitaiina ai i tatou. E faapei foi o le tulaga lea sa tetele ai foi saunoaga ananafi e uiga i le tautua, ia e matalasi foi ma matagofie le faaupuina o leaí ..e leai lava se sui usufono mamalu e le i saunoa i lenei upu o le tautua, a o le felanulanuai matagofie o faaupuga. Ia au foi latou ia, ia e taumafai foi au ina ia avatu foi se faaupuga, atonu pe logolelei foi, ia a o le tautua i lau faaupuga, o le nuu o lea e faapea mai i lou nuu, o lona uiga, o le nuu e faasino i ai lo ta matai, o le mea lena e ao ona faatino ai lau tautua.

O le tautua la i lau faaupuga puupuu ma le faaaloalo, lau Afioga i le Fofoga Fatalai, o lou fai nuu, o lou fai nuu i le taimi lenei. Aua a tatou o loa e toso i tua mai le amataga o le foafoaga o le tautua, ia e matuafí ..a o le taimi lenei, e fesili i tatou, po o le a le tatou mea o fai? O le a le tatou galuega ma le tatou tautua o lo o fai? Tatou te le toe apaapa i tua i le tautua a o tatou tuaa, tulou, se i oo mai i le taimi lenei, a o le agaga moni, o le tatou taimi, o le tatou galuega o lo o fai, aua o le faaupuga lena o le tautua, tautua i lo tatou nuu pei ona i ai le Tulafono Tau Faaofi, ioe, tatou fai nuu, ioe. O tatou e saofafai i totonu o le nuu ma faia tonu o le nuu, ia e faapena foi, e tautua i so o se mea, aemaise o le ekalesia, ia e faapena foi o tatou nuu ma vaega eseese uma e talafeagai ma le tatou faatinoina o lea upu o le tautua.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

Ou te talitonu foi o se tasi vaega o le Tulafono Tau Faaofi o lo o tulai mai e tusa ai ma tagata i latou le mamalu o le atunu o lo o resitala ma faapea ona resitala i lenei itumalo nuu tu taulaga, ia e moni, o lea ua maoti mai lava ia nuu ma tuaoi e tusa ai ma lea foi itumalo fou, o Nuu Tu Taulaga. E ala ona taua faapitoa lenei itumalo, ona o lo o faapena lava ona agai i ai saunoaga ma filitagaga i ai le tofa ma le faautautaga e tusa ai ma le mea o lo o faatino ai le resitalaina o latou o lo o fia i ai i totonu o lenei itumalo. Ae silasila foi, o le taua o le Tulafono Tau Faaofi lenei, o lou palota i le mea o lo o e alaala ai ma e afio ai, e le faaitiitia ai i le mea o lo o e matai ai ma aveese ai se iota mamalu o lou suafa matai. Ae ou te talitonu o le taua o lenei vaega o le Tulafono Tau Faaofi, ona e i ai ona faaleleia ai le mea o lo o e afio ai, ia faapena ona saogalemu ai ma faapena ai ona i ai tonu se sui usufono e fitoitonu i ai lea foi itumalo ma lea itumalo i le agai i luma ma le faaleleia o le mea o lo o e alaala ai.

E pei ona matou fai atu, o le galuega a tatou uma nei vaeatu lo outou mamalu o sui usufono mamalu o le Palemene, a maea ona faamalamalama se Tulafono Tau Faaofi ma faapea ona tatou mautinoa ua outou silafia ma tatou iloa lelei le agaga o le Tulafono Tau Faaofi, e faapena foi ona tatou agai i tua i o tatou itumalo ma faamalamalama lelei. O le mea la lea ou te faapea atu ai pei ona saunoa nisi, o lo o fai e nisi o sui usufono i o latou itumalo ni faamatalaga sese, ae ou te talitonu i lenei itula lau Afioa i le Fofoga Fetalai, o le agaga moni lea e tatau ona tatou faia le mea e talafeagai ina iaí .. A o faafogafoga mai foi nisi o tatou itumalo i le faamatalaina o lea foi ..i lo outou fia silafia o vaega uma o lenei Tulafono Tau Faaofi e ao ai ona resitala i itumalo o nuu tu taulaga, ia o lena, e tele galuega e tele taimi o faapena ona taumafai e faamalamalama ma faatino le faailoa i aiga taitasi, e le gata foi i lo outou faafogafoga mai i le Maota Fono nei i saunoaga a sui usufono mamalu aemaise o lo tatou Malo ma le Palemia, i le faamalamalamaina o vaega uma ia e agai i o tatou itumalo, ia o lea ua matou fai atu, a le atoatoa se matou faamalamalamaga, a o lea lava e manino i le matou agai ma feiloi atu ma lo outou faafogafoga mai ma faamatala atu le mea e sili ona atoatoa ma lelei, aua ne i i ai se fenumiai.

Ma e le faaumia se matou faamatalaga i lenei itula o le aso. Ou te faapea atu ai faamalo i sui usufono mamalu sa saunoa e tusa ai foi ma lenei itumalo. E i ai foi nisi sui usufono uaí O le taimi lea faapea o lea lava e fasi le gata mai tulou lava. E leai ua uma lena taimi ua tuanai atu, ioe, a o le taimi nei tatou agai i luma o lea ua taoto i tulaga malu lelei le Tulafono Tau Faaofi, tatou agai i luma i le tatou faiga filifiliga a le tatou atunu. Ia o lena e i outou aao le filifiliga o sui usufono ma Taitai o le tatou Malo e manuia ai Samoa. Ou te faapenei atu ai, faamalo faafetai i le tatou Palemene, e tusa ai foi ma le tau faaatoatoaina ma le faapupulaina o lenei vaega o le Tulafono Tau Faaofi e tusa ai ma le Itumalo o Nuu Tu Taulaga.

Lau Afioa i le Fofoga Fetalai, e momoli atu lau faafetai tele i lau Afioa i le Minisita, ma ou te lagolagoina le fesuiaiga o lo o i ai nei le tatou Tulafono Tau Faaofi. Ma le faaaloalo lava.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

Ia manuia le aso lenei lau Afioga i le Fofoga Fatalai, ia faapena ona maua pea le tofa aua le taitaiga o le tatou Fonotaga. Ia manuia foi sui usufono mamalu uma o le Palemene. Manuia le tatou aso.

**SUI FOFOGA FETALAI:** Ua faamalo saunoa i lau Afioga i le sui usufono o se tasi o sui usufono mo le itumalo o le Au Palota Taitoatasi. O lo o maua pea le avanoa mo se isi sui usufono.

Ia, tulai maia lau Afioga i se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

**Afioga Hon LEAUPEPE TOLEAFOA APULU FAAFISI (Aana Alofi Nu.1):** Malo faafetai. Faafetai mo le avanoa i lau Afioga i le Fofoga Fatalai. E tulai atu foi ma le agaga faaaloalo e fia faia foi se manatu puupuu e tusa ai o lenei Tulafono Tau Faaofi. Ma e auai faatasi foi le agaga i le faafetai tusa ai o le taulaga siitia e lau Afioga i lenei taeao ua matagofie le alofa o le Atua ma Lona agalelei i le paia o le Palemene, aemaise o Taitai o le atunu.

A o lenei Teuteuga ua toe tuuina mai, e i ai isi Teuteuga sa ou manatu e tatau ona tuuina mai, ae peitai ua le faaooina mai e le Matagaluega ma le Afioga i le Minisita. Ae le afaina, e tele aso e le uma ai le faiaso a le Alii. E tasi lena Teuteuga e manatu e talafeagai ma o se mea alagatatau. E ui i lea, e faiaso pea le Alii ma e faapena ona toe foi i ai i lena Paeaiga pe a toe taliu mai le Faiga Palota Aoao a le atunu.

Ae ua ou tulai atu e fai se manatu i le tulaga lea o le tautua ona sa mamafa i ai saunoaga a sui usufono i le aso ananafi. E le tineia pe faataumatatao se finagalo o se isi sui usufono i se finagalo o se isi sui usufono aua o le manatu lava lea o le sui usufono ia e ao ona faaali e ala atu i le tatou Palemene, a o faafogafoga tapuai mai le atunu, aemaise o le vaitaimi lenei o lo o faapena ona tuuina atu. E ui lava ina tele le avanoa sa tuuina atu i le itupa o tamaitai, aua e le i noatia lea vaega, e le i faapea na noatia lea vaega e tapu tamaitai ina ia o e tauva i a tatou faiga palota. E pei lava foi ona silafia ma lauvivilu ai le atunu, o uluai tafaifa ia o le atunu, o tamaitai na latou umia suafa matai, e oo mai lava i lenei vaitaimi e le o taofia lea tulaga. Ae ona o le manatu ina ia faapena ona faaopoopoina le faitauaofai o ni sui usufono tamaitai i totolu o le Palemene, o se itu lelei foi lea ma e faapena ona tatou manatu, o le tatou faiga palota lea o lo o loma nei, o i ina o le a faapena ona toatele nisi o le paia o feagaiga a le atunu, po o tamaitai o le atunu o le a faapena ona tauva ina ia mafai ona avea ma sui usufono o le Palemene.

Ae, ne i sese lau faauigaina aua e tofu lava le sui usufono ma lana faauigaga o le Tulafono Tau Faaofi lenei. E pei e faapea lou talitonuga, o le Tulafono Tau Faaofi lenei. E pei e 6 masina e nofo ai i totolu o Nofoa Tu Taulaga. A o le tolu tausaga, o le tolu tausaga foi lenei e mautinoa ai e le sui faatu, po o le alii po o le tamaitai i le afioaga o la e matai ai, po o faia le tautua i le nuu.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

Ia, e pei e faapena le talitonuga, ae ua ou lagolagoina le tulaga o lenei Tulafono Tau Faaofi ma lona Teuteuga, ina ia tutusa ai le sui usufono o lo o tauva i totonu o afioaga ma alaalaafaga, e tolu tausaga e nofomau ai tautua, ma le sui usufono o lea o le a tauva i Nofoa Tu Taulaga, e ono masina e nofomau ai, ae tolu tausaga o la e sa tautua ai i le afioaga o la e matai mai ai. Ne i faapopoleina leaga e i ai foi nisi o tuafafine o lo o faapena nisi foi o aiga o lo o faapena ona faamoemoe e taufetuli mai o latou tamaitai i le faiga palota o lo o loma nei. Ou te manatu e leai se mea e faapopoleina ai lea itu, aua o le tautua i le nuu i lou lea talitonuga, e amata mai i le taimi o e tamaitai, e pei lava foi ona saunoa nisi o sui usufono. E amata mai i le taimi o e talavou, aoga, ona tea lea ma le aoga ua faigaluega, ona e fai tamaitai loa lea. Aua e faapena foi i le soifuaga faataualealea, e te alu ese loa ma le aoga ona e fai taulelea loa lea. E faapena foi la i tamaitai, o tatou tuafafine po o tamasa po o feagaiga, ona amata mai loa lea o le tautua i le nuu. O le tautua faalenuu la lena, o lea e fai mai ai le Tulafono Tau Faaofi, e tautua i le nuu, o i ina e amata mai ai. E ui lava ina tautua foi le tina ma le tama i tua atu o ia, a o lea foi ua toe tautua le tama ma le teine, le teine Samoa ma le tama Samoa. Ona uma lea o lena, faasolo mai, e iu ina faapea le aiga, afaí o se alo o se tamalii, faapea, ia ave i ai le faaaloaloga, o le tamaitai matua lena o le tatou aiga, o le aunafaapae lena. Ia ona sau ai lea faapena, e faasolo mai lava i le sitepu lena.

Peitai ane, ua filifili le aiga ona avea loa lea ma matai ua tofia e avea ma matai ae toe tolu tausaga fai le palota pe toe lua tausaga ma le afa fai le palota. I lou talitonuga e agavaa e alu i le palota, aisea? A foi lea sa tautua mai le fia tausaga? O le tautua faa-matai, e tautua i le nuu, o le faa-Samoa lena. O le tautua faa-matai e uso lava ma le tautua faalenuu, tautua faa-Samoa aua o le matai o le matai Samoa e le o se matai papalagi. O lou lea talitonuga i le faauigaina o le tolu tausaga, a ia tutusa le tolu tausaga a le sui o lo o faapena ona tauva i Nofoga Tu Taulaga ma le sui o la e tauva mai alaalaafaga ma nuu i tua. O le a le mea o le a eseese ai o le matai?

E pei o lou lea talitonuga i le tau faapupulaga o lou lea talitonuga, i lo le faasao mai e nisi o saunoaga faatosina i le aso ananafi, pe faaleaga foi i le Tulafono Tau Faaofi a le Malo, ae lelei lava ona faasao mai aua o lou lea manatu, a o lou lea manatu ua ou tulai atu ai. Ia, talosia ia ia toatele ni tamaitai e omai i le faiga palota o lo o loma nei, aeí .

**Afioga Hon Palusalue Faapo II (Taitai o le Itu Agai):** Lau Afioga i le Fofoga Fetalai, o se mea e fia faasao. Se i fai foi se malologaí

**Afioga Hon LEAUPEPE TOLEAFOA APULU FAAFISI:** Se ou te ofo au, o lea e lauga tama o le nuu ae tulai maií E sa tele i le faa-Samoa lena mea. Ia e ui i lea, o le a ou nofo i lalo.

**SUI FOFOGA FETALAI:** O lou finagalo lava e te alaala i lou nofoa. Ae i lalo o le Tulafono Tumau a e le fia alaala i lalo ae faaauau lau saunoaga, e faaauau lava lau saunoaga. Ae tulai mai lau Afioga i le Taitai o le Itu Agai.

**12 AOKUSO 2015**

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

**Afioga Hon Palusalue Faapo II:** Lau Afioga, faafetai, ona e foliga mai o au lea e faatu mai i ai le saunoaga. O le mea lea na ou tulai atu ai ananafi, faatoa pasia le Teuteuga o le Faavae i le faaiuga o le 2003 ina ia 10% le numera o tamaitai i totonu o le Maota, lea na pasia i le 2003. Ae a tatou maitau i nai tamaitai lea e taulamua nei i le polokalame lea ina ia toatele tamaitai e saofaga e avea ma sui faatutu, o nai tamaitai o lea e faigaluega i Apia, e seasea o i nuu. O lea la ua maua le avanoa e tauva ai i le faiga palota ina ua teuteu le Faavae. A o le a le mea lea ua tupu nei? Seiloga e tolu tausaga e tautua ai, ae sa ta faapea o le a maua le avanoa e nai tamaitai, po o ai lava e fia tauva, e tusa ai ma le Teuteuga o le Faavae. E pei la o le mea lena lau Afioga i le Fofoga Fetalaií .

**SUI FOFOGA FETALAI:** Se i tulai mai lau Afioga i le Palemia.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi (Palemia):** Lau Afioga i le Fofoga Fetalai, o se mea e fia faasao i le saunoaga a se tasi o sui usufono mo Aana Alofi Nu1, Afioga Toleafoa po o le Afioga ia Leaupepe. O lea ou te matau i lau saunoaga, o tamaitai ia e te saunoa i ai, o tamaitai o la e matai, ae i ai la isi o lea ua nonofo lava ma fai a latou faaiuga, e leai ni a latou tautua o fai. Se ou te ofo po o fea e aumai ai nei faamatatalaga? E i ai nisi tina ia e taulamua, o la e fai a latou tautua po o latou monotaga, ae peiseai o le faatosina lava lea e fai, e faavae i luga o le manatu e tatau ona aua le faia se mea faapea, aua o la e silafia e le itumalo, o le lava e leai se tautua o faia e le palota i ai. A o lea ua faamaonia i si toeaina o Pule, tafao tafao lava Palu malo i le Lotto, oso loa sau ae fai le palota i le isi masina faaulu ai, ia malo loa, a ua le alu i Malua la e na au i ai e alu i ai e faifeau. O lea la e sese le mea lea e i ai, sa tatau ona alu e faifeau, ona o lea na valaau, a o tupe, tupe, lea e fai ai faatosina.

E pei o le mea lena o lea ou te matau atu i le saunoaga a le sui usufono mo Aana Alofi Nu.1, Afioga Hon Leaupepe Toleafoa Apulu Faafisi, o lea lava e i luga o le laina, o tamaitai, e mataií .

**Afioga Hon Palusalue Faapo II:** Lau Afioga i le Fofoga Fetalai, e te faatagaina la ituaiga saunoaga?

**SUI FOFOGA FETALAI:** Alaala mai i lalo le sui usufonoí

**Afioga Hon Palusalue Faapo II:** E le faapea a Palemia ona saoloto leaí

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** O la e fai le latou tautua, e sao ai Toleafoa, o Toleafoa ma Aiono, e tautuaina e faiava, a o se mea mataga tele le gutuoso o le faiava i alii o le nuu.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

**SUI FOFOGA FETALAI:** Tulai mai lau Afioga i le Taitai o le Itu Agai ona o lea sa taua lou suafa íí

**Afioga Hon Palusalue Faapo II:** E pei ua tae mai le lapisi e tau punipuni ai le Tulafono Tau Faaofi lea na fai nei. O le Tulafono Tau Faaofi e pei e foliga i lau vaai, e taufaavalea i tina, ioe. Ua fai fai le Tulafono ina ia faataga tina e o i le palotaí .

**SUI FOFOGA FETALAI:** Se i fai atu la le tala lea a le Nofoa i lau Afioga i le Taitai o le Itu Agai. Alaala mai i lalo se i fai atu le tala lea a le Nofoa.

**Afioga Hon Palusalue Faapo II:** O lea la ua e faatonua mai au ae le faatonu le Palemia.

**SUI FOFOGA FETALAI:** O le ogasami lea ua e toe asaina i le taeao lenei, o le ogavasa foi lea sa e asaina ananafi, lea na e saunoa i ai e te tetee i le Tulafono Tau Faaofi lea, lea na faafogea uma i ai le Maota ma Samoa atoa i lau tetee. O le a la le isi mea o le a e toe tetee ai foi o lea ua uma ona faaali lou finagalo? Faaauau pea le saunoaga a Toleafoa. Sa ou tuuina atu le avanoa ia te oe i lalo o le Tulafono Tumau, ona o lea sa taua lou suafa i le saunoaga a le Palemia. A o lou tetee i le Tulafono Tau Faaofi, ua uma ona faailoa i totonus o le Maota i le aso ananafi lou tetee.

Ia tulai maia le Taitai o le Itu Agai.

**Afioga Hon Palusalue Faapo II:** Lau Afioga i le Fofoga Fetalai, ou te le i nofo nofo ou tu i luga, leaga o la e na faasaga mai le saunoaga a Leaupepe i lau lauga ananafi, ioe. O lea la ou te tu atu ai e faamalamalama, a o lea ua e saunoa mai sa ou lauga tetee i ai ananafi. O lou alofa i nai tina o lo o fia omai i le Palemene. Ioe.

**SUI FOFOGA FETALAI:** Onosai mai o lea o le a fai atu le isi tala lea a le Nofoa ae le i tulai mai le faauilavea a le Afioga i le Minisita. Sa ou maitau atu pei sa taua e le sui usufono mo Aana Alofi Nu.1 lou suafa i lana lauga. E le faapea o le a avae le silasila mai ia te oe ma mea e te faapea ai o oe lea e fai agai i ai le lauga. A tilotilo mai foi ia te au pei o lea ou te manatu o lea e fai mai le Nofoa le lauga. E faamalie atu e le i taua lou suafa. O le mea foi lea e le tatau ai ona e faauilavea. O ananafi, sa e fesili ai i le tulaga lea. O lea e le i oo i le taimi e te saunoa ai. O lea ou te maitauina lelei e te le i saunoa, ae na o lau fesili.

Ae faamalie atu i le Minisita mo Tina ma Tamaitai, Atinae o Nuu ma Afioaga ma Agafesootai, tulai maia.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

**Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu, Afioaga ma Agafesootai):** Faafetai i lau Afioga i le Fofoga Fatalai mo le avanoa vaeatu foi le mamalu o le Maota, e faapea foi le faafofoga a le atunu. E leai, ua ou tulai, ona o lea ou te maua mai o saunoa le Palemia sa tatau ona alu le Taitai o le Itu Agai e faifeau, ona e sao na au i Malua, ae pau le mea ua sili ai le leí

**Afioga Hon Palusalue Faapo II:** Lau Afioga i le Fofoga Fatalai, ua tatou vaai i ai o a ia saunoaga faapea? E faataga ia saunoaga solitulafono faapea? Se aua le 1 mafaufau....faatonuí .sa Fofoga Fatalai le Minisita ae matua le malamalama lava.

**SUI FOFOGA FETALAI:** Malie ia lau Afioga i le Minisita, taatia ia lea mataupu. Alaala mai i lalo se i fai atu le tala a le Nofoa. Taatia ia le au i Malua ma le 1 au, ma le malo i le Lotto ma le 1 malo. O lea ua ou faatonu atua le Minisita e tusa ai ma ala o le Tulafono Tumau. Ae faamalie i lou finagalo, taatia lea mataupu. O le tulaga lea o lea e ala ai ona umi le tatou Fonotaga, a o lea e fia tuli le tatou taimi.

Tulai mai lau Afioga i le sui usufono mo Aana Alofi Nu 1.

**Afioga Hon LEAUPEPE TOLEAFOA APULU FAAFISI:** O le a ou le toe pai foi i le itu lea. E faamalie atu i lau Afioga, e ala ona fai ma ou tilotilo i o i le Taitai o le Itu Agai, ona o la e pei e faapea ma....i le isi taimi, o lona uiga la o la e selau pasene lau agiagi. O lea la ou te sese ai, o la e faapea mai, a lea ua fai atu ae ua toatamai le Toeaina.

**SUI FOFOGA FETALAI:** Aua nei toe faia ni lima faapena aua e i ai foi isi lima e ese ai ona le manaia lea.

**Afioga Hon LEAUPEPE TOLEAFOA APULU FAAFISI:** Malo faafetai. O le a ou le toe pai foi i le itu lea. E faamalie atu foi i lau Afioga, e ala ona fai ma ou tilotilo i o i le Taitai o le Itu Agai, ona o la e pei e faapea mai i le isi taimi. O lona uiga la o la e selau pasene lau agiagi. O lea la ou te sese ai foi lea o la e faapea mai, ae o la e fai atu ae o la e ua toatamai le Toeaina. E faamalie atu ai.

E pei o le agaga lena, aua o la e molimauina e le Afioga i le Taitai o le Itu Agai le tautua lea ou te avatu, leaga o la foi e silasila i ai le Afioga i le Taitai o le Itu Agai, i le agaga tonu lea ma le aganuu lea ou te taumafai e avatu. E pei ona tulai mai foi le Afioga i le Palemia e tusa ai o le matou taumafai atu, o le itu lena. Ia lafo ia i tua i le mea o lo o fai mai ai le faaiuga o tatou, aua tatou te tapisa lava, tulou le Fono Aoao a le Palemene, a o tu e fai mai ai le tatou faaiuga i le tatou o mai ma le tatou toe foi mai.

**Tulafono Tau Faaofi o Teuteuga o le Tulafono o Faiga Palota (Nu.3)****2015 - felafolafoaiga faaauau i luga o le faitauga faalua – Aso 2**

Lau Tapuaiga Samoa, ia alo ia i lou faiva manaia aua le tatou faiga palota pe a tala soifua se ola ma se malosi. Ae o le tulai atu lena ma le agaga faaaloalo i ni manatu e lagolago ai le Tulafono Tau Faaofi lenei i le tolu tausaga. Faafetai.

**SUI FOFOGA FETALAI:** Malo le saunoa i lau Afioga i se tasi o sui usufono mo Aana Alofi Nu 1. O lo o maua pea le avanoa mo se tasi sui usufono e fia saunoa.

Tulai mai lau Afioga i le sui usufono mo le itumalo o Siumu. Sosoo mai oulua ma le Toeaina o lo o oulua vaavaalua faatasi.

**Tofa Hon TUUU ANASH LEOTA (Siumu):** Faafetai i lau Afioga i le Fofoga Fetalai mo le avanoa. Ou te tulai atu ma le faaaloalo e na ona lagolago le Tulafono Tau Faaofi, o le Tulafono Tau Faaofi o lea ua tuuina mai e Teuteua ai le Tulafono o Faiga Palota. E i ai Teuteuga na nanau i ai le Komiti ma le manatu e tuuina mai faatasi ma le Teuteuga lenei, aemaise lava i le Teuteuga lenei i le vaega ia taumafai e taofia tagi e faasaga i sui tauva po o sui ia e manumalo mai i le taimi e uma ai faiga palota. Aemaise o isi o vaega ia i Teuteuga ia e i ai le talitonuga o le Tulafono Tau Faaofi lava ia sa tatau ona na o le lima lava tausaga e faasala ai le sui. Ae peitai ane ona o le fesasai o le Tulafono Tau Faaofi, o lea ua pei ua overlap ai le mea ua oo i le sefulu tausaga. E i ai le agaga e manatu alofa foi i nai sui o lo o faapena ona afaina i le vaega lea. Aua o le agaga lava ia o le Malo i le taimi na taumafai ai le Teuteuga lea, ua lava le pau o le sui na manumalo mai le palota e fai lona faasalaga, ae peitai ane e pei ua fesiliglia mai e le Faamasinoga vaega ia, e pei e foliga mai ua le lava faasalaga i sui ia ua manumalo mai. A o le naunautaiga lava ia taofia ai i latou o lo o faapena ona naunau e matua faaleaga pe fai ni tuuaiga ina ia faapena ona faaleaogaina ai Nofoa o ni sui ua faamanuiaina ma ua manumalo mai faiga palota. Ae peitai o le vaega lea lau Afioga ua ou tulai atu ai e lagolago tele i le Tulafono Tau Faaofi e pei ona tuuina mai.

E pau lava si vaega lea ou te fia faamauina ai se faamatalaga ona o lo o aafia ai lou itumalo. O eelele ia e i Vailima. Lau Afioga o le itumalo lenei o lo o i ai fanua e latalata i le 30 eka na foai mai e le Malo o Niu Sila ia Siumu, o lea e nonofo ai na o tagata Siumu lava. O lea la vaega o le tau sa tau ai o Siumu Lua. Sa taumafai e aumai ai se tulaga foi lea i fuafuaga o tuaoi o faiga palota ae peitai o lea e le o aumaia ai lava le vaega lea o Siumu. O le mea na tulai mai, a i ai ni tagata e fai le resitala ua taumafai e sue se pulenuu. A fesiliglia foi e le pulenuu o lea foi i Vailima ma Vaoala ae faapea mai e le o ni tagata Siumu. E lagona ai lava le faanoanoa. O lea foi ua taoto le talosaga i le Afioga i le Minisita mo Tina ma Tamaaitai, se i fai se pulenuu o lea vaega o le matou nuu. Masalo pe ua afe tagata ia e affio ma papaaao i le vaega lea. O lea la e faafofoga mai le Ofisa o Faiga Palota, se i fesoasoani mai pe aí afai lava ua lava au e faamaonia tagata o lo o nonofo aíí

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

**Tofa Hon Tolofuaivalelei Falemoe Leiataua:** Lau Afioga i le Fofoga Fetalaií

**SUI FOFOGA FETALAI:** E faamalie atu i le sui usufono o lo o saunoa, se i tuu atu le avanoa i le Minisita mo Tina ma Tamaitai, Atinae o Nuu, Afioaga ma Agafesootai.

**Tofa Hon Tolofuaivalelei Falemoe Leiataua:** Faafetai i lau Afioga i le Fofoga Fetalai. Ou te tulai ma le agaga faaaloalo ona ua taua le mataupu i pulenuu. A o le Tulafono, o le Tulafono Tau Faaofi o Teuteuga o le Tulafono o Faiga Palota. Ae ina ia toa pea le Toeaina aua ne i oso le toto maualuga, aua le popole o lea e fai suesuega a le Matagaluega, ae le faapea foi na ona aumai lava maua loa ma le faaiuga. E tatau lava ona fai se suesuega i mea faapea, po o ni tagata Siumu o i ai po o ni tagata o la e nofo lisi ae le o ni Siumu. E pei o le mea lena. Ae o le a taatia mai pea le talosaga, aua le popole lau Afioga e leai se mea o le a afaina ai fua lou tofi i le sui o pulenuu i totonu o se vaega o Vaoala ma Vailima. Ma le faaaloalo.

**SUI FOFOGA FETALAI:** Faafetai. Tulai mai lau Afioga i le sui usufono e faamaea mai lau saunoaga.

**Tofa Hon TUUU ANASII LEOTA:** Faafetai i lau Afioga i le Minisita mo Tina ma Tamaitai. E faaipoipo lava le vaega lea. E fesoasoani tele le pulenuu i le taimi lenei. E pei o le ala lea o lou taumafai atu. A faapea e uma lava le fonotaga lenei maua lou pulenuu, faafetai. Aua o le mea la lea na ou talosaga atu ai i lau Afioga i le Minisita, lafo maia ia te au ou te faia le faamaoniga o tagata uma i Vailima.

O le isi vaega, o eleele uma ia i le agai atu i le tuasivi i Malololelei agai atu loa i Siumu, o Siumu uma lava la e nonofo ai o. A o lea e fai si faigata ona aumai e faapalota. Ou te le iloa la po o fea áí o lea e faamalulu atu i se tasi o sui usufono mo le Vaimauga Sisifo ma se tasi o sui usufono mo le Palota Taitoatasi, o tagata Siumu aua e te lua aumaia. O le ala lea o lou taumafai atu, o tagata lava o si ou itumalo la e alaala i vaimea ia.

**SUI FOFOGA FETALAI:** Malie lau Afioga i le sui usufono, o lea e i ai le faauilavea a se tasi o sui usufono mo Vaimauga Sisifo.

**Susuga Hon Papaliitele Niko Lee Hang (Palota Taitoatasi):** Faafetai i lau Afioga i le Fofoga Fetalai mo le avanoa. E faamalulu atu i le sui usufono mamalu o lo o saunoa. Ona o lea e taua nuu ia o le matouí

**SUI FOFOGA FETALAI:** E faamalie atu Papaliitele, o lea ou te tuuina atu le avanoa i se tasi o sui usufono mo Vaimauga Sisifo, Tofa Lefau Harry Schuster.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

**Tofa Lefau Harry Schuster (Vaimauga Sisifo):** Lau Afioga i le Fofoga Fetalai, a taatia i le Tulafono lea e i ai, o le fanua lea e talanoa mai ai lou uso a sui usufono mo Siumu o lea e i gauta ia matou, o le mea tau palota ua urban, a o le eleele ia o le eleele o le Vaimauga. O le meaalofa lea na faameaalofa ia Siumu a o le eleele lava o le Vaimauga. O le matou tau i le Vaimauga pe na o le lua maila mai Siumu, o i ina e tau i ai le Vaimauga. A o le matapu lea e le mafai ona faia i i, o lona uiga matou te o i le Land and Titles Court.

**SUI FOFOGA FETALAI:** Faafetai. Ua ala ona tuuina atu e le Nofoa le avanoa ona ua lalata le vaivaa. Ma o lauga uma lava ia e sau e pei e foliga mai e lauga popole. O le a tuu atu le avanoa i se tasi o sui usufono mo le Palota Taitoatasi.

**Susuga Hon Papaliitele Niko Lee Hang:** Faafetai mo le avanoa. E le fia faalavelaveina foi le saunoaga matagofie a le sui usufono mamalu mai Siumu. Ae ua tulai atu ona ua taua nuu ia e lavea i le itumalo fou lea o Nuu Tu Taulaga Sasae. O le mea moni lava o le Tulafono Tau Faaofi lea ua taatia nei, ua uma ona taua i le saunoaga a le sui usufono mamalu o lo o lavea i lalo o le itumalo lea e le o taua Siumu. A faapea e i ai ni tagata Siumu o lo o afifio i nuu ia ae i ai ni suafa matai, ia e talafeagai le o pea latou eí a leai ni suafa matai e pei o le tulaga lea o le piitaga, o le aiatatau lava a latou e faaaoga le avanoa lea aua o lea e nonofo i fanua ia e umia saoloto i totonu o le ma itumalo lea ma se tasi o sui usufono mo Vaimauga Sisifo. Aua o Vaimauga, a i ai foi ni sui usufono mamalu o le atunu o lo o faapena ona i ai ni suafa matai e fai ni piitaga i Vaimauga, o le avanoa foi lena mo i latou e palota ai mo le Vaimauga. A faapea lava e leai ni suafa matai leai ni piitaga, o le Tulafono Tau Faaofi lena e manino, palota mo le Itumalo Tu le Taulaga Sasae. Ma le faaaloalo lava. Faafetai.

**SUI FOFOGA FETALAI:** Tulai mai lau Afioga i le Minisita mo Galuega, Felauaiga ma Atinae Eseese.

**Afioga Hon Manualesagalala Mati Tuigamala Enokati Posala (Minisita mo Galuega, Felauaiga ma Atinae Eseese):** Lau Afioga i le Fofoga Fetalai leaga o la e pei e faataatia mai, a o la e faafogofa si ou itumalo o Safata, a sau loa i Siumu ua tau i le Vaimauga. Ae o le mea tonu a taatia i le Tuamasaga, a uma Siumu ua tau mai Safata oo mai i le Vaimauga. O la foi e i ai eleele o Safata i le va lena. Ma le faaaloalo.

**SUI FOFOGA FETALAI:** Faafetai faamanatu mai i le vaega lea o le a misa nei po o ai e ona eleele. Tulai mai lau Afioga i le sui usufono mo Siumu.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

**Tofa Hon TUUU ANASII LEOTA:** Faafetai i lau Afiofa i le Fofoga Fetalai. Na ona ou toe faamanatu atu i le.... o Tuamasaga lena, o le Itutolu o Sagaga, o Sagaga le Ailaoa, Sagaga le Vaimauga ma Sagaga le Palalaua, o le lea la e lavea atu ai uma eleele ia i tua i Siumu.

Faafetai i lau Afiofa i le Minisita o lea lava e silafia lelei tuaoi o le Vaimauga ma Pae. O fanua ia e le i faatumaotia, e le o ni freehold. A o le Tulafono lea e avatu ai nei i urban seats, seiloga o ni tagata e nonofo i eleele freehold, o lea foi la ua i ai le talosaga a lou itumalo, ua fia mananao e faaumia saoloto eleele ia. A o le a se i tau vaavaai po o le a le auala e mafai ai ona Teuteu le Tulafono Tau Faaofi lea ina ia mafai ai ona faa-freehold eleele ia mo si ou itumalo. Pau ia o vaega ua ou tulai atu ai e lagolago i le Tulafono Tau Faaofi, ma ou te talitonu e le tatau ona toatele nisi finagalo e toe faaalia o lea ua manino ma malamalamama. Pau lava le tulaga, ia tatou taumafai tatou te toe foi mai uma i le isi faiga palota. Ia manuia le Fonotaga. Manuia le faafofoga a Samoa.

**SUI FOFOGA FETALAI:** Malo le saunoa i lau Afiofa i le sui usufono. Ia taatia maia lou fanoga o lea e faafofoga atu le Minisita e ana le Tulafono Tau Faaofi. E i ai se isi sui usufono e fia saunoa?

Tulai maia lau Afiofa i le sui usufono, se tasi o sui usufono mo Faasaleleaga Nu 1.

**Afiofa Hon GATOLOAIFAANA AMATAGA ALESANA GIDLOW (Faasaleleaga Nu.1):** Faafetai i lau Afiofa i le Fofoga Fetalai mo le avanoa. E faapea foi ona faatalofa atu ai i le paia ma le mamalu o le tatou Maota Fono, amata mai i le Afiofa i le Palemia ma le mamalu o le Kabeneta, o lena foi Itu o le Maota le Afiofa i le Taitai o le Itu Agai ma le Palemene atoa, aemaise le faafofoga mai a Samoa.

Lau Afiofa i le Fofoga Fetalai, ua ou tulai atu e ave le lagolago i le Tulafono Tau Faaofi ua faatulai mai nei. Sa faapea lava o le a leai se faamatalaga, ona o se Tulafono Tau Faaofi i lau vaavaai atu i ai, o se Tulafono Tau Faaofi e le faaituau. O lo o taatia mai lava aemaise lava le tulaga lea o le tautua. E taatia mai lava so o se tasi lava e fia alu i le tauvaga, e agavaa nei e tatau ona mafaufau ma vaavaai i ai ae le i ai se faamoemoe. Ae faalogologo atu lava e tatau lava ona avatu le agaga faafetai i lenei Tulafono Tau Faaofi, aua ua pei ua laga ai finagalo ma ua faaali mai ai finagalo o le toatele o sui usufono mamalu o le tatou Palemene, aemaise lava sui usufono mamalu tamalii i lo latou lagolagoina o le tulaga lea o le tulai mai o tamaitai e tauva i le tatou faiga palota lea o le a i ai nei. Ua ou faalogologo atu, ua ou popole lava ne i avea lea vaega o le Tulafono Tau Faaofi i le tautua, ma mea o le a afaina ai le taumafai mai a tamaitai. Ae faalogologo atu lava i le faamalamalamaina o le tautua ma le tulaga ua aumai ai le Tulafono Tau Faaofi, e leai. Ae o ni luitau foi ou te lagona ua leva ona nofo tapena foi i ai tamaitai.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

A o le mea taua i lau faalogologo atu lau Afioga i le Fofoga Fatalai, o le alaga lea e faatauaina pea tamaitai i totonu o aiga ma nuu ma alaalafaga. E pei e faamalosiau ia i tatou tamaitai o lo o faapea ona i ai le faamoemoe mo le tauvaga, aua ne i faavaivai o lo o i ai le lagolago a le itupa o alii i tamaitai. E ave lava le latou faamuamua i tamaitai aua le latou tulai mai, ua faataua foi Tulafono ua agai i ai le tatou Malo i lenei vaitau.

E pei o le agaga lena lau Afioga i le Fofoga Fatalai ou te matua faafetaia ai lenei Tulafono Tau Faaofi i le Afioga i le Tamaitai Minisita ma le Matagaluega, aua ua avea, e le gata o le l faaituau a ua tagai lava i itu uma o le agavaa o se tasi e fia pale i le tulaga tofi, ae ua avea lea ma mea ua tatala mai ai finagalo ma le faamuamua o alii i tulaga faatamaitai i totonu o aiga ma nuu ma itumalo. O se ai lena mo i matou o le a matou iloa ai, o le a matou pale mai e le gata i le 10% ua faataga mai, ae o le a ova atu.

O se faamatalaga lena lau Afioga i le Fofoga Fatalai, e lagolagoina ma le atoatoa lenei Tulafono Tau Faaofi. Manuia le tatou Fonotaga.

**SUI FOFOGA FETALAI:** Faafetai mo le saunoaga a lau Afioga i le tamaitai sui usufono mo Faasaleleaga Nu.1. E moni lava a au, ae o lo o maitauina, e le o popole tamaitai, o lea e popole sui usufono alii lea e i ai nei. E le o popole tamaitai. E i ai se isi e fia saunoa, o lo o maua pea le avanoa.

Ia tulai maia lau Afioga i le sui usufono mo Vaisigano Nu.1.

**Afioga TUFUGA GAFOALEATA FAITUA (Vaisigano Nu.1):** Faafetai mo le avanoa i lau Afioga i le Fofoga Fatalai. E i ai foi le talitonuga ua maua se malosi fou o le Palemene i le malologa i le po anapo, e faapena foi ona auai faatasi i le faafetai ua e siitia i le Atua e pei ona e fofogaina i le taeao.

O lenei Tulafono Tau Faaofi e lagolagoina e lenei sui usufono. Na pau lava le tulaga, o le tulaga lea o agavaa o sui usufono sa tulai mai i le toese lea e i ai le lua tausaga ma le fa tausaga aua o le tulaga tau tautua, e manatu ua malamalamo foi lenei sui usufono, e pei o nuu ta te ola ae ai. E talitonu ta te tautua mai lava i lota laitiiti i le taulealea, e oo loa i le taimi o le a faamatai ai oe ae ua latalata i le palota, e te agavaa se i vagana la se nuu e faamatai ai oe, o le nuu o lou tama po o le nuu o lou tina ae mamao ese, ona faitau lea o lau tautua i le taimi e te matai ai, ona manino lea o lea tulaga.

A o le Tulafono Tau Faaofi lea pei ona i ai le lua tausaga ma le fa tausaga, ona popole ai lea o lenei usugafono. Ia e pei e foliga mai pei o le upu foi lea e ave i le leopard e le mafai ona suia lona spot. E faapea foi la le tulaga lea, po o le a lava le taimi e te falepuipui ai, once you are a convict, o oe lava o lei E popole le taofi ina ne i maua e le Tulafono Tau Faaofi lenei ona maua lea o le avanoa o le tagata sa nofosalu, e omai e fai atu Tulafono e ola ai le atunuu lenei.

**Tulafono Tau Faaofi o Teuteuga o le Tulafono o Faiga Palota (Nu.3)****2015 - felafolafoaiga faaauau i luga o le faitauga faalua – Aso 2**

E pei o le popolega lena o lenei usugafono, aua o le avanoa lenei o le a tatala ona ulufale mai lea o tagata sa nofosala ma fai Tulafono e ola ai le atunu. O le popolega lena i lau Afioga i le Fofoga Fatalai ma ni manatu e tuuina atu i le Afioga i le Tamaitai Minisita e silasila totoa i ai aua le lumanai o le tatou atunu.

Ia o si tamai tuualalo atu lea aua le alo atu i luma o le Afioga i le Minsita ma le Ofisa aua le lumanai o Samoa ma le faiga palota o lo o lumanai nei. Ia manuia le Fono.

**SUI FOFOGA FATALAI:** Malo saunoa i lau Afioga i le sui usufono. Sa ou tau vaai i le Tulafono Tau Faaofi pei ona tuuina mai pe i ai se vaega o aafia i le mea sa e laga ma e saunoa i ai, ma ou te faailoa atu e le o le tulaga lena o lo o i ai le Tulafono Tau Faaofi Toe Teuteu o tatou i ai nei.

Le paia e o le Palemene, i faiga masani tau Fonotaga, e lua lava itu, o le lagolago ma le 1 lagolago. O le tele o finagalo lea ua faaalia, peitai ane o lea ua faailoa mai le fia saunoa o le sui usufono mo Gagaifomauga Nu.1. O le a ou tuu atu le avanoa i le Tamaitai sui usufono ona toe tasi ai lea o se isi lauga, ona tatou oo loa lea i le tali a le Minisita ona faagasolo ai lea o le tatou galuega. Ma lou faaaloalo.

Tulai maia lau Afioga i le sui usufono mo Gagaifomauga Nu.1.

**Tofa FAIMALOTOA KIKA IEMAIMA STOWERS (Gagaifomauga Nu.1):** Ia, faafetai i lau Afioga i le Fofoga Fatalai mo le avanoa o lenei itumalo. E faatalofa aloaia atu ai i lau Afioga, ae le gata i lea o le Palemia ma le Kapeneta. E faapea foi le Taitai o le Itu Agai ma le Sui Taitai ma lea Vaega o le Maota, ae faapea foi le mamalu o sui usufono uma o le Fono a Samoa.

E faatalofa aloaia foi i le tapuaiga a Samoa o lo o faapena ona faafogafoga mai ma e talitonu o leitio uma o lo o faapena ona ki mai i le Fono a Samoa o lo o usuia nei. E tulai atu foi lenei sui usufono e faaleo le agaga lagolago i le Tulafono Tau Faaofi. Ou te le toe asa finagalo ma manatu ua maea ona faaalia ma alu ai le aso atoa ananafi ma le amataga foi o lenei taeao, aua o a tatou tala o lo o faapea ona talanoa ai i inei, e talitonu lava le manatu o lo o faapena ona faafogafoga uma mai i latou i nuu ma afioaga i le faautautaga loloto a alii ma faipule. O le mea la lea e mafanafana ai lava le loto, aua fai mai foi upu e masani ona talanoa i nei, e tautala galuega, e tautala galuega. I lou la faalogologo mai le aso ananafi seia paia lenei taeao, o le a le mea o le a tatou popole ai tatou ua saofafai i nofoa o itumalo taitasi pe afai o la e tou te silafia ua atoatoa le lagolago a alii ma faipule i le tatou galuega?

Ia, o le tulaga lena, ae ona o lo o faalogologo mai le itupa o tina ma tamaitai, faafetai foi i le uso a sui usufono. E faapena lava, pei lava ona taumafai, faafetai foi i le Malo mo le amanaiaaina o le itupa vaivai ina ia faatoatele sina fuainumera e lagona ai se leo o lenei itupa o lo o lagolagosua malosi i a outou Afioga i totonu o nuu ma afioaga, faagaoioi mea uma e faapena ona finagalo i ai alii ma faipule i nuu ma itumalo taitasi, o lo o tua mai lava i le itupa o tina ma tamaitai.

**Tulafono Tau Faaofi o Teuteuga o le Tulafono o Faiga Palota (Nu.3)**  
**2015 - felafolafoaiga faaauau i luga o le faitauga faalua – Aso 2**

Sa ou tau popole lava i le Tulafono Tau Faaofi ina ne i afaina, ae peitai ua faitau ma faitau ma faalogologo foi, ou te talitonu o tina ma tamaitai o le atunu lenei, e ese le atamamai. Ma o lo o faafogafoga totoa mai, o lo o fai le latou tautua. O tina ma tamaitai o lo o faafogafoga mai i totonu o nuu ua matai, ou te talitonu e leai se afaina po o le auala lea e te sao ai i totonu pe afai ua e finagalo e te tauva i le faiga palota o le a fai nei.

O le vaega foi o tina ma tamaitai o lo o galulue punouai i Apia nei ma le Malo i Kamupani ma mea uma, o lo o aitaumalele a ua matai, ou te talitonu e leai se mea e popole ai, o lo o fai atu le tautua lea i totonu o nuu ma afioaga. So, o si ou lena maitau i le Tulafono Tau Faaofi.

Na pau lava si mea lea atomu ua le toe saofia i lenei taimi ae se i faamau ane lau Afioga i le Tamaitai Minisita ma le Matagaluega, i lata toe tilotilo auilili i ai, e muamua ona ou faatulou i sui usufono foi o Vaimauga ma Faleata, o le tulaga lea ua ta manao ita ona o leaí i le mea foi lea o le aia tutusaí .

*Na motusia Felafolafoaiga i le itula e 10:10 i le taeao, ona o le motusia o le eletise ma faaauau ai le malologa masani mo le 96 minute.*

*Na toe faaauau Taualumaga a le Fono Aoao i le itula e 11:04 i le taeao.*

### ISI FAASILASILAGA A LE FOFOGA FETALAI

**FOFOGA FETALAI:** E faasilasila atu ua toe amataina nei Taualumaga a le Fono Aoao Faitulafono.

E momoli atu le agaga faafetai ma le faamalo i le onosai mai o le tatou Maota i lenei vaega o le aso, e manatu e le o toe na ma le laina le tolopo ai o le tatou Fono ona o faafitauli le maalofia, ona o le faaletonu mai o le tatou paoa, e ui i lea, o lo o gaoioi pea le aufaigaluega o le Faalapotopotoga o le Malosi Faaletise mo le tau togafitiina o le faamoemoe.

E i ai foi le manatu maualuga o lo o manino ma malamalama le paia o le tatou Maota aemaise o le faafogafoga mai a Samoa, ia o le vaiaso mulimuli lenei o le tatou Fonotaga ona o le 1<sup>st</sup> toe gafatia lava e tulaga o le tatou Maota nei le tulaga e tatau ona i ai, ae na manatu lava o le tatou omai pe faaiu le tatou Fono mulimuli mo le vaiaso mulimuli nei i le tatou Maota, ia ona faaiu ai lea i le Aso Faraile ia ona tuu aloaia ai lea i lalo. O foliga vaaia ia o le tulaga o lea ua i ai le tatou Maota ua le o toe atoatoa lona malosi i ona vaega uma, e le gata o tulaga o le anofale, ia a o le tulaga foi o e o lo o tautuaina e ala i ueaalesi faasalalau ia aemaise foi Standby Power e masani ona i ai.

O le agaga lea e faamalulu atu ai i le paia o le tatou Maota i lenei taeao, ae momoli atu le agaga faafetai i le tauavagameaina sa feagai ai foi le Afioga i le Sui Fofoga Fetalai ma le tau amataina o le tatou Fono i lenei taeao, ia faafetai o lea ua tatou taunuu mai i lenei vaega o le aso.

### **Isi Faasilasilaga a le Fofoga Fetalai**

Ona i ai lea o le manatu i le fetuunaiga ma le Palemia, e le mafai ona tatou faaauau ai pea i le tulaga lea ona o tulaga o lo o tulai mai. O lona uiga afai e tatou te alo foi i le taimi lenei e mautinoa lava, o i ai foi nisi o faafitauali e tatou te le o mailoa. Ae o le a ave le avanoa i le aufaigaluega o le Faalapotopotoga o le Malosi Faaeletise e latou te galulue ai e amata atu i le aso sia aulia le taeao a taeao. Ua i ai le fetuunaiga ma le Palemia ma au nei, ou te lagona, o mea mautinoa ma le saogalemu mo tatou uma, e le gata o lea na ona ola o a tatou mea faaleotele leo ma moli, ia ae le o ola le ea malulu o le Maota, o lona uiga, e le saogalemu ma soifua maloloina mo le paia ma le mammalu o le tatou Maota Fono.

Ona ou manatu ai lea, le paia e ma le mammalu o le tatou Maota aemaise o le faafofogaaga mai a le tatou atunu, i Ofisa Sili o Pulega ma Pule Sili o Matagaluega ma Faalapotopotoga a le Malo ua tatou faatasi i lenei aso, ua ou manatu o le a tatou tolopo i le aso a taeao.

E faamalulu atu i sui usufono o lo o i luga o le gaga tuleiga ma saunoaga, ia o le a avatu le avanoa mulimuli pei ona saunoa le Sui Fofoga Fetalai i le taimi ua sola, ia ona fai ai lea o a outou tuleiga ma saunoaga i le aso a taeao, ia ona faasolo loa lea o le tatou galuega. O fea lava le itula o le aso o le a iu ai le tatou galuega i le aso a taeao e pei ona outou silasila i le Pepa o Galuega, ia fai lena. Ona e talitonu, o lea ua uma ona faatulaga le tatou galuega faagasolo mo lenei Fonotaga, ia e tatau ona onosai mai le tatou Maota mo le aso a taeao i le faataunuina o Tulafono Tau Faaofi taua, e pei ona i lumamea le faitauga muamua, faitauga lona lua pei ona faataatiae a tatou Tulafono Tumau, ae tatou agai pea seia maea le tatou galuega i le aso a taeao.

O le faasilasilaga lea i le paia ma le mammalu o le tatou Maota Fono - ma e i ai le faamoemoe, o le a outou taliaina le faatalauula atu ona o mea ua tulai mai i le tatou Maota i lenei taeao.

Ae le i faaiuina le tatou Fono i lenei aso, ou te tapa lau Afiofa i le Sui Fofoga Fetalai, ia tulai maia e faaiu lou aso lenei, ona tatou tuupo ai lea mo le aso a taeao.

*Na motusia Felafolafoaiga ina ua tolopo Tauualumaga a le Fono Aoao i le itula e 11:09 i le taeao seia aulia le Aso Tofi, 13 Aokuso 2015 i le itula e 9:00 i le taeao.*